

# Et Jaor- en Produktverslag 2016

## Stichting Stellingwarver Schrieversronte



## Stichting Stellingwarver Schrieversronte,

Willinge Prinsstraote 10,

8421 PE Oldeberkoop/Berkoop

### Saemenstelling van et bestuur en de direktie op 31 december 2016

Et bestuur bestaot uut: Ype Dijkstra (veurzitter t/m 12 meie, Oosterwoolde), Hendrik Fokkema (siktaoris, Sunnege), Henk Koelma (ponghoolder t/m 12 meie, Hooltpae), Jan Baas (twiede veurzitter, De Oosterstreek, veurzitter vanof 13 meie), Peter Riksma (Zandpol), Jan Russchen (Oosterwoolde), Geke Zanen-Dokter t/m 12 meie (Zuudwoolde Gr.), Gerda Hoogeven (ponghoolder vanof 13 meie, De Fochtel) en Hans Salverda (vanof 13 meie), Zorgvlied.

De direktie is ienheufig en de funktie van direktie wodt uitvoerd deur Sietske Bloemhoff, Ni'jberkoop.

### Rechtsvorm, statutaire naeme, vestigingsplak, doelstelling

De statutaire naeme ludet in artikel 1 Naeme en zetel: Stichting Stellingwarver Schrieversronte en et vestigingsplak is officieel Oosterwoolde, gemiente Oost-Stellingwarf. De doelstelling in de statuten is vaastelegd in artikel 2. Doel 1. *De Stichting stelt zich ten doel het Stellingwerfs als levende streektaal te handhaven en te bevorderen. 2. Zij tracht dit te bereiken door: a. het zelf uitgeven of doen uitgeven dan wel het bevorderen van het verschijnen van publicaties in het Stellingwerfs; b. het bevorderen van het gebruik van het Stellingwerfs als spreek- en schrijftaal in het Stellingwerfer taalgebied; c. het verzamelen, bewaren en ter inzage leggen van publicaties in het Stellingwerfs; d. het organiseren en bevorderen van bijeenkomsten, waarin het Stellingwerfs als voertaal wordt voorgestaan; e. bij te dragen aan de verbreiding van de kennis van en over het Stellingwerfs; f. bij te dragen aan het vastleggen, handhaven, zo mogelijk verlevendigen of doen herleven van oude gebruiken in de Stellingwerfen; g. bij te dragen aan de verbreiding van kennis van de Stellingwerfer geschiedenis en folklore; h. het onderhouden en bevorderen van kontakten met personen, groepen en instellingen, die geacht worden het Stellingwerfs en de uitingen hierin te bevorderen of te willen bevorderen; i. alle andere wettige middelen, welke voor het doel der stichting bevorderlijk kunnen zijn.*



*Op uutneudiging van Twiede Kaemerlid Lutz Jacobi gong een grote groep sutelders van de Schrieversronte op deensdag 8 meert naor Den Haag. Daor was veur heur een speciaole rondleiding en daornao vertelde Jacobi over heur wark in Den Haag. De laeste jaoren dot Lutz Jacobi mit an de Stellingwarver sutelaktie (foto: Lenus v.d. Broek)*

# ET JAOR- EN PRODUKTVERSLAG 2016 VAN DE STICHTING STELLINGWARVER SCHRIEVERSRONTE

Et bestuur van de Stichting Stellingwarver Schrieversronte bödt et jaorverslag 2016 an. In et financiële jaorverslag bin dit keer ok de jaorciefers van Stichting Et Boekefoons opneumen. Dat is daon omreden ien en aander een dudeliker beeld gefte van de gezaemelike ciefers van beide stichtings. De Stichting Stellingwarver Schrieversronte en Stichting Et Boekefoons bin now ienkeer onlosmaekelik mit mekeer verbunnen. Dat dee o.e. bliken tiedens et vierjaarliks bestuurlik overleg mit de strukturele subsidiegevers (perveensie en Stellingwarver gemienten) op 8 december 2016. Et bestuur het an de haand van dat overleg konstateerd dat de in 2004 anpastede situaosie - et instellen van een appat boekefoons naost de Stichting Stellingwarver Schrieversronte op verzuuk van de overheden van doe - bi'j de overheden van now niet meer goed liekt te warken.

Et bestuur konstateert dat d'r in et jaor 2016 verschillende aktiviteiten van de stichting uitvoerd of opzet binnen en tot mooie risseltaoten leided hebben of leiden zullen. Et bestuur konstateert liekewel ok dat mit een kleine passeniele bezetting en ondaanks de grote inzet van veul vri'jwilligers lange niet alle warkzemenheden uitvoerd wodden kunnen die de stichting graeg veur heur rekening nemen zol. De Stellingwarver Schrieversronte gong ok in 2016 veerder mit et ontwikkelen en uitvoeren van aktiviteiten zoas die in 2012 weergeven binnen in de nota 'Stellingwarf veuruut'. Opni'j bin meerdere toekomstgerichte kontakten legd mit Stellingwarver dörpen in et kader van 'Mit et Stellingwarfs naor de dörpen toe'. Daornaost wodde opni'j veul wark verzet op et gebied van de veerdere digitalisering van o.e. et Kenniscentrum. Veur et herorganiseren van dat ienige Stellingwarver Kenniscentrum in de Stellingwarver regio zetten heur een groep van zeuven vaaste vri'jwilligers wekeliks in. Ok now wodde weer dudelik dat de Stellingwarver Schrieversronte ok op et gebied van aachtergrondinfermaosie in een belangrieke funktie veurzicht veur de inwoners van Stellingwarf, mit daorbi'j extra ommedaenken veur de jeugd. Et digitaole kenniscentrum Stellingia gruuide in een jaor tied van 928 naor 1.604 unieke bezukers. Naor de algemiene infermaosiewebstee zette de gruui deur naor 8.634 unieke bezukers en ok de groep bezukers van StellingPlus gruuide flink. (Zie overzicht op een eer plak in dit jaorverslag)Opvalend is ok de positieve warking van et gebruik van Facebook; een hiele ere groep interesseerde personen maekt op die wieze veerder kennis mit Stellingwarver zaeken. De Schrieversronte blifft op verschillende fronten saemenwarken mit ere instituten of groepen. Zo was d'r weer de saemenwarking mit verschillende historische verienings en dörpsarchieven, mar wodde ok saemenwarkt mit instituten as Kunstwerf, en Frysk en Frij. Ok mit bepaolde boekuitgiften was d'r een mooie saemenwarking mit een peer ere uitgevers. De Schrieversronte bleef butendat ok now weer aktief op et gebied van et toerisme in oonze mooie regio, zoas dat indertied ofpraot is mit de subsidiegevers.

De belangstelling veur et wark en de uitgiften van de Stellingwarver Schrieversronte t.b.v. de eigen streektael en streekkultuur stemt ok dit jaor opni'j tot tevredenheid. Et aanbod van inhooldelik goeie manuskripten blifft goed. Schrievers, ok de jongere schrievers, weten et pad naor de uitgeveri'je van de stichting goed te vienen. De belangstelling van lezers en et koperspeblik blifft op peil.

## **Wark- en financiële situaosie**

Bi'j et bestuur van de Stichting Stellingwarver Schrieversronte bleven ok in 2016 de toch al grote zorgen over de financiële situaosie. Dat komt mit naeme deur de kottings van de laeste peer jaor. Ledewinakties zoas tiedens de Stellingwarver Dag, en akties as 'Vrientien veur 'n tientien' leveren niet genoeg op om zokke kottings op te vangen. Juust in een tied dat mit naeme kulturele instellings mit een weerommelopend tal leden te maeken krigt, zit dat d'r niet in. Op verzuuk van de subsidiegevers wodde indertied een uitvoerig onderzuuk daon naor veerdergaonde saemenwarking mit de Friese instituten Tresoar, Afûk en Fryske Akademy. Zo zollen neffens de overheden bi'jglike bepaolde uitvoeringskosten bespeerd wodden kund. De Stellingwarver Schrieversronte, de direkties van Afûk, Tresoar en Fryske Akademy kwammen liekewel, nao uitvoerig overalderhaande meugelikheden van saemenwarking praot te hebben, tot de konklusie dat d'r gien kosten besperende saemenwarking meugelik is. De kosten die oonze stichting maekt veur bi'jglike et uitbreiden en onderhoud van et Kenniscentrum - de overheden numden as bezunigingsmeugelikhied et verplaetsen van et Kenniscentrum naor Tresoar - zollen dan verschoeven naor Liwwadden. Ondaanks et risseltaot van et onderzuuk, dat deur alle vier de instituten onderstreept wodt, zien de overheden et aandere...

Gelukkig kon oonze stichting, deur extra financiële middels van bepaolde foonsen, sommige aktiviteiten of uitgiften toch tot uitvoering brengen.

## Verslaglegging

Veur de financiële verslaggeving van de Stichting Stellingwarver Schrieversronte en van de Stichting Et Boekefoons zorgde MRW-Accountants in Wolvege.

## Saemenstelling bestuur

Et bestuur bestuurt op heufdlijnen, neffens et principe cultural government. De direkteur adviseert et bestuur over inhoudelike zaeken en ontwikkelt et ni'je warkplan, dat deur et bestuur vaastesteld en dat vervolgens veurlegd wodt an o.e. de subsidiegevers (de beide Stellingwarver gemienten en de perveensie Friesland). Et bestuur vergeerderde in et verslagjaar zeuven keer.

## Saemenstelling bestuur in december 2016

<b>Veurzitter:</b>	Ype Dijkstra (t/m 12 meie), Oosterwoolde Jan Baas (vanof 12 meie), De Oosterstreek
<b>Siktaoris:</b>	Hendrik Fokkema, Sunnege
<b>Ponghoolder:</b>	Henk Koelma (t/m 12 meie), Hooltpae Gerda Hoogeveen (vanof 12 meie), De Fochtel
<b>Twiede veurzitter:</b>	Jan Baas (tot 12 meie), De Oosterstreek
<b>Leden:</b>	Peter Riksmā, Zandpol; Jan Russchen, Oosterwoolde; Geke Zanen-Dokter (tot 12 meie), Zuudwoolde; Hans Salverda (vanof 12 meie), Zorgvlied

## Passeniel

De overlegstruktuer binnen de organisaosie is as volgt: ien keer in zes weken is d'r warkoverleg en aanderhalve weke veur elke bestuursvergeerdering hebben veurzitter, ponghoolder en direkteur een ofstemmingsoverleg.

### *In dienst in et verslagjaar:*

Sietske Bloemhoff, direkteur 24 uren, Stellingwarfs binnen hiemkunde 8 uren.

Trijnie Telkamp, administratief wark, projektbegeleiding en DTP *De Ovend*, 24 uren.

Immy Sloot-Brugge, administratief wark en financiële administraosie, 16 uren.

Saskia Douma, 8 uren kennis- en dokumentaosiecentrum.

Ninke van der Veen, 3 uren in de maond, webmaster.

### *Vaaste vri'jwilliger:*

Rosa Bosma, huushooldelike dienst, 3 uren.

Klaas Dijkstra, beheerder hiemkundewebstee, 3 uren.

### *Vri'jwilligers:*

Veur de Stellingwarver Schrieversronte zetten heur jaarliks, op wat veur meniere dan ok, zoe'n 200 personen in.

## Kemmissies en warkgroepen

Binnen de Stichting Stellingwarver Schrieversronte funksjoneren de volgende kemmissies:

### ■ warkgroep kursusleiding Stellingwarfs veur beginners

(Henk Bloemhoff, Geert Lantinga en Mark van Veen)

### ■ veldnaemekemmissie

(de kemmissie komt bi'j mekeer wanneer neudig; koördinaosie Henk Bloemhoff)

### ■ redaktie De Ovend

(Jannes Westerhof, Jan Koops; buroredakteur Sietske Bloemhoff)

### ■ saemenstelling jaorlikse kelender

(Sietske Bloemhoff)

### ■ sutelaktiekemmissie

(Koop Oosterloo, Immy Sloot, Sietske Bloemhoff)

### ■ warkgroep Publiciteit

(Gerrie Koopstra, Anneke Koopstra, Koop Oosterloo, Akkie Zeilstra, Albertha Zwaagstra)

### ■ kemmissie Stellingwarver streeknaemen op 'e kaorte

(Geert Lantinga, Henk Bloemhoff (koördinaosie); disse kemmissie komt bi'j mekeer wanneer neudig)

### ■ warkgroep Stellingwarfpop / Stellingwarfs Meziekfestival

(Klaasje Herder, Kjest Herder, Piet Tjassing, Sietske Bloemhoff)

### ■ warkgroep Dokumentaasiecentrum/Kenniscentrum

(Fettje Alten, Hendrik Betten, Margreet Bergsma, Kiena Bouwer, Saskia Douma (buro), Martha Dragt, Jaap Elzenaar, Kees Koopstra, Ankie Verbaan, Jan de Vries, Sietske Bloemhoff (koördinaosie))

### ■ warkgroep rouwverwarking

(Grietje Bosma, Attie Nijboer)

### ■ warkgroep konversaasiekursus Praotgroep Stellingwarfs

(Ypie v.d. Boer, Sietske Bloemhoff)

### ■ warkgroep netuurexkursies

(Hans Lanting, Harm Smid, Andries van der Veen, Freddie de Vries, Sietske Bloemhoff)

### ■ Warkgroep De Lende

(Henk Bloemhoff, Geert Lantinga, Meindert Schroor, Jan Slofstra, Dennis Worst, Jan Slofstra, Sietske Bloemhoff)

## Vertegenwoordigers

De Stichting Stellingwarver Schrieversronte is vertegenwoordigd in:

- **et bestuur van de Stichting Sont** (dr. Henk Bloemhoff)
- **literaire warkgroep 'Alles rondom taal', Stichting Kunstwerf** (Sietske Bloemhoff)
- **bestuur Iekaole omroep Odrie** (Attie Nijboer)
- **jury H.J. Bergveldpries** (Peter Riksmā)
- **warkgroep H.J. Bergveldpries** (Sietske Bloemhoff, adviseur)

## Social media

### Webstee [www.stellingwarfs.nl](http://www.stellingwarfs.nl)

De algemiene webstee van de Stichting Stellingwarver Schrieversronte wodt aktueel hōlen deur et buro-Henk Bloemhoff is op vri'jwillige basis webredakteur.

### Webstee [www.stellingplus.nl](http://www.stellingplus.nl)

De webstee [www.stellingplus.nl](http://www.stellingplus.nl) wodde veerder uutbouwd deur webmaster Ninke van der Veen. De kōördinaosie van de warkzēmheden d'r veur en de webredaktie wo'n verzorgd deur Sietske Bloemhoff.

### Webstee [www.stellingia.nl](http://www.stellingia.nl)

De kōördinaosie van [Stellingia.nl](http://www.stellingia.nl) - dat is et digitaole kenniscentrum van de stichting - is in hanen van Sietske Bloemhoff, et bouwen en veerder ontwikkeljen van de webstee gebeurt deur webmaster Ninke van der Veen.

### Twitter


Et Twitteraccount van de stichting wodt op vri'jwillige basis aktueel hōlen deur Henk Bloemhoff.

### Facebook

Op Facebook wo'n wekeliks twee berichten plaetst die verzorgd wodden deur Immy Sloot.

*Onderstaonde grafiek lat zien hoe et gebruik van de verschillende websteden jaarliks flink gruiet:*

Tal bezukers websteden



## PRODUKTVERSLAG 2016

### A 1. INFERMAOSIE, ADVIES EN PUBLICITEIT

#### Infermaosie

In et verslagjaar wodde weer flink wat infermaosie verstrekt angaonde veul onderwarpen waor de stichting aktief mit doende is of mit uut aende gaon zal. In de verschillende media, niet allieend in et gebied zels, mar ok daar ommetoe, verschenen d'r een flink tal passeberichten. Dat gul veur alle (boek)uitgiften, mar liekegoed veur alle ni'js rond de veerdere ontwikkeling van bi'jglieks et Kenniscentrum en de bi'jheurende webstee stellingia.nl. Ok veur alle aktiviteiten, die vaeks in gezaemelikhied mit ere instellings of verieninges orgenseerd wodden, was d'r in de media een protte ommedaenken. Infermaosie wodt ok meerdere keren in et jaar verstrekt via de lekaole omroepen Odrie (Oost-Stellingwarf) en Centraol (West-Stellingwarf).

#### Advies

Zowat daegeliks wodt d'r tillefonisch of via de sociaole media om raad of advies vraagd op et gebied van mit naeme de tael, mar ok veur de kultuur en geschiedenis. Dat gelt niet allieend veur de bewoners uut de regio, mar de vraogen kommen liekegoed van bedrieven, (onderwies)instellings, verienings en overheden. De Stellingwarver Schrieversronte bliekt altied weer hiel leegdrumpelig: meensken kommen ok gewoon even an as ze wat weten willen... Dat gef mitien an dat veul meensken een hiele goeie biening hebben mit et instituut en de meensken die d'r warken. Op dit plak numen we even de extra hulpe die oonze stichting verliet an bi'jglieks begraffenisondernemers: bi'j heur is een speciaol nommer bekend veur in de aovenduren of in et weekaende. Zoks gef an dat de Stellingwarver Schrieversronte, ok op sociaol gebied, een belangrieke rolle veur de hiele Stellingwarver gemienschap as diensverliende instaansie waor et gaot om vraogen over de tael, de streekkultuur en de Stellingwarver geschiedenis.

#### Publiciteit

Veur alle boekuitgiften, kursussen en aktiviteiten wodt veur veul publiciteit zorgd. Dat gebeurt uteraord deur berichten te sturen naor de verschillende kraanten, tidschriften en lekaole omroepen, mar nog veul meer wodt inzet op publiciteit via websteden, facebook en twitter. Mit naeme in dit verslagjaar vaalt op hoe die media meer en meer lezen wodt; veur een groot pat gaot et daarbi'j ok om personen die via de kraanten niet berikt wodden. Veur publiciteit zorgt ok een groep vri'jwilligers deur infermaosie te geven op tal van marken. Naost de verkoop van boeken en infermaosie daarover is d'r ok ommedaenken veur o.e. et kursuswark van de stichting.

### A 2. KENNISCENTRUM

#### Algemien

Et Kenniscentrum van de Stellingwarver Schrieversronte is een uniek centrum veur de Stellingwarver gemienten. Op gien eer plak is zoveul infermaosie te vienen over - in et eerste plak - de tael, as in dit centrum. Al vanof de oprichting van, eerst de verieninge Stellingwarver Schrieversronte, in 1972 wodde begonnen mit et opzetten van een streekarchieff. In et eerste plak zol et gaon om et verzaemelen en beweren van gegevens, artikels, opnaemen etc, over de tael. In et tweede plak gong et liekewel ok om streekgerichte onderwarpen en de geschiedenis. Deur de jaoren henne wodden ok deur pattekeliere biezondere kollekties binnenbrocht, zodat in 45 jaar tied een unieke verzaemeling an streekgeschiedenis in et gebouw van de stichting beweerd wodt. Veur veul kollekties geldt dat die allieend bi'j de stichting in Berkoop beheerd wodden meugen, zol dat om wat veur reden niet meer kunnen, dan gaon ze weeromme naor de eigener of evt. naor naobestaonden. Veul (biezondere) kollekties, teksten, boeken en geluudsmateriaol wo'n sund 2012 deur een vaaste groep van vri'jwilligers herorgenseerd en digitaliseerd. Et digitaliseren is bedoeld om alle materiaal goed veur de toekomst te beweren, mar ok t.b.v. de speciaole webstee veur et Kenniscentrum **www.stellingia.nl**. As alles uut et Kenniscentrum scand en invoerd is gaot et om meer as 100.000 titels. Veur de wieze waarop ien en aander opzet is en uitvoerd wodt het de stichting advies had van perveensiaol archiefinspekteur Jetze Dijkstra. Intied bin op Stellingia al veul artikels, boeken en kollekties plaetst. De webstee is now al een biezondere en unieke webstee, die mit naeme veur leerlingen van et vervolgonderwies, studenten Nederlaans en geschiedenis, historici en ammeur-historici van groot belang is. De koördinaosie van de warkzemheden veur et Kenniscentrum en Stellingia

was weer in hanen van Sietske Bloemhoff. Twie keer in et jaor wodt mit de vri'jwilligersgroep de stand van zaeken van et halfjaor doorveur deurpraot en de taeken veur et volgende halfjaor vaastesteld.

### Herorganiseren en digitaliseren

In 2016 gong mitwarkster Saskia Douma deur mit et herorganiseren van et Kenniscentrum. Ze kon daar weer acht uren in de weke an besteden, en kreeg daarbi'j op 'e maendagmorgen opni'j de hulpe van vri'jwilliger Jan de Vries. Noodat bepaolde kategorieen deur heur opni'j inricht en vaastesteld binnen kan et materiaal kodeerd en digitaliseerd wodden. Et koderen gebeurde, op angeven van Saskia Douma, deur de vri'jwilligers Margreet Bergsma en Fettje Alten. Vervolgens bin de verschillende verzaemelings en kollekties digitaliseerd deur de vri'jwilligers Kiena Bouwer, Martha Dragt en Ankie Verbaan. Veur et plaetsen van de verzaemelings en kollekties die veur Stellingia binnen, zorgde Ankie Verbaan. Veul berichten in de media wodden t.b.v. et Kenniscentrum ok dit jaor weer vergeerd deur vri'jwilliger Kees Koopstra. Vri'jwilliger Jaap Elzenaar zorgde veur een index van de unieke verzaemeling an boeken en tidschriften angaonde iemkeri'je die bi'j et Kenniscentrum onderbrocht is. Ok zorgde hi'j veur een uitgebreide index van et boek *De geschiedenis van de dorpen van Ooststellingwerf* (van dr. T.H. Oosterwijk). Beide indexen bin op Stellingia plaetst. Hendrik Betten gong veerder mit et digitaliseren van geluudsbanen en video's; et doel is dat een tal daarvan in 2017 op Stellingia plaetst wodden.

### Bezoekers an de haandbiebeltheek en et kenniscentrum

Ok dit jaor was d'r weer riegelmaatig bezuuk van personen die materiaal raodplegen wollen in et Kenniscentrum. Belangstellenden veur tael en historie kun gebruik maeken van de doorveur inrichte studiekeamer om de gegevens uut o.e. de haandbiebeltheek en et Kenniscentrum in te zien. De boeken uut de haandbiebeltheek en et Kenniscentrum, mar ok de speciaole kollekties, foto's, geluudsmateriaol etc. wo'n niet uutliend. In dit verslagjaor weren d'r weer mit riegelmaat vraogen van studenten en leerlingen van et vervolgonderwies. Vaeke is dan al infermaosie haeld van de websteden **stellingwarfs.nl** en **stellingia.nl**. Veul interesseerden kun now thuus alvast een indrok kriegen van wat d'r in et Kenniscentrum te vienen is an inhoodelike infermaosie. Et tal vraogen dat via internet en tillefoon binnenkomt was dit jaor opni'j roem boven de driehonderd.

**Beriek: roem boven de 300 personen**



*In et Kenniscentrum van de Stellingwarver Schrieversronte wodt een unieke verzaemeling boeken en tidschriften beweerd op et gebied van de iemkeri'je.  
(Foto: Sietske Bloemhoff)*



## B. EDUKAOSIE

### B 1. KURSUSSEN VEUR VOLWASSENEN

In et verslagjaor wodden de volgende kursussen hollen:

#### 1. Kursus Stellingwarfs veur beginners

- In et veurjaor wodde in De Hoeve een kursus 'Stellingwarfs veur beginners' ofsleuten. De kursus wodde veur et eerst in een dörp anbeuden; eerder wodde de kursus in et gebouw van de Stellingwarver Schrieversronte hollen. Dat de kursus now de hieltied in een aander dörp anbeuden wodt is om (nog) meer naor de meensken toe te gaon. De kursusleiding beston uut dr. Henk Bloemhoff, Geert Lantinga en Mark van Veen. **Dielnemers: 8**

- In et naojaor gong de kursus 'Stellingwarfs veur beginners' uut aende in Appelsche. De kursus wodde daor i.s.m. de Historische Verieinge van Appelsche e.o. anbeuden. Veur de kursus meldeden heur zeuven dielnemers an, mar twie van heur moesten heur om persoonlijke omstaandigheden op et laeste memment ofmelden. De kursusleiding beston uut Henk Bloemhoff, Geert Lantinga en Mark van Veen. **Dielnemers: 5**

#### 2. Kursus Laandschopsgeschiedenis

Veur de kursus Laandschopsgeschiedenis was ok dit jaor weer veul belangstelling. De kursus wodde anbeuden in de dörpen Der Izzerd, Hooltwoolde en Ni'jhooltwoolde. Et doel van de kursus, die ontwikkeld is deur drs. Dennis Worst, is 'et lezen leren van et laandschop'. De kursus die uut vier lesaovens en twie ekskursies bestaot, wodde geven deur Emiel Beijk, Henk Bloemhoff, Geert Lantinga en Dennis Worst. **Dielnemers: 12**

#### 3. Digitaole kursus Stellingwarfs

Dit verslagjaor wodde veerder warkt an de opzet veur een digitaole kursus Stellingwarfs. Op de webstee StellingPlus bin daor al wat onderdielen van plaetst. Et gaot daorbi'j om onderdielen die ok veurdatt de kursus hielemaole anbeuden wodt de liefhebbers veur de kursus al op weg helpen kan.



*De kursisten van de kursus Laandschopsgeschiedenis op ekskursie in de Koepelbos, tegere mit de kursusleiders Dennis Worst en Emiel Beijk  
(Foto: Lenus v.d. Broek)*



*De kursus 'Stellingwarfs veur beginners' gong in november uut aende in Appelsche  
(Foto: Lenus v.d. Broek)*

## B 2. HIEMKUNDE

In 2016 wodden acht uren in de weke besteded an de ontwikkeling van Stellingwarfstaelig en hiemkundig lesmateriaol veur et vak Hiemkunde in et basisonderwies in de gemienten Oost- en West-Stellingwarf. Mit Stichting Comperio (eupenbaor onderwies), Stichting De Tjongerwerven (kristelik onderwies) en vertegenwoordigers uut et onderwies wodt elk jaor gezaemelik een jaorwarkplan opsteld.

### *In et verslagjaor wodde zorgd veur et volgende lesmateriaol:*

#### ■ *Veur groep 1 en 2:*

1. Veur disse leeftiedgroep bin ni'je verhaelen schreven die op de speciaole webstee veur hiemkunde stellingwerf-heemkunde.nl plaetst binnen. Ok et bi'jheurende verwerkingsmateriaol is op die webstee anbeuden. Somige verhaelen sluten an bi'j et thema van de kienderboekeweke.

2. De Wegwieser. An de haand van een speciaole wegwieser kan een taelkulturele speurtocht deur et eigen dörp maekt wodden. Schoelen kun evt. et verslag d'r van plaetsen op 'e hiemkundewebstee.



3. Projekt Piepmoes. Veur basisschoele De Riemsloot in Appelsche wodde, op verzuuk, et taelprojekt 'Piepmoes op vekaansie in Appelsche' ontwikkeld en uitvoerd. Et projekt sleug zo goed an dat besleuten is om et ok an aandere schoelen an te bieden. (Foto's: Lenus v.d. Broek)

#### ■ *Veur groep 3 en 4:*

1. Veur de groepen 3 en 4 bin n.a.v. et thema van de kienderboekeweke Stellingwarver verhaelties schreven en vertaald. De verhaelen mit bi'jheurende opdrachten bin te downloaden op de speciaole hiemkunde-webstee.

2. De Wegwieser. An de haand van een speciaole wegwieser kan een thema-speurtocht deur et eigen dörp maekt wodden. Schoelen kun evt. et verslag d'r van plaetsen op 'e hiemkundewebstee.

#### ■ *Veur groep 5 en 6:*

1. Veur groep 5 en 6 wodde warkt an een speciaole PowerPoint daor op veul historische elementen op te zien binnen uut elk dörp van vroeger. Veur de PowerPoint zorgen Jan Koops en Jan de Vries n.a.v. heur boek Stellingwarf in oolde beelden. In de PowerPoint is d'r ommedaenken veur de tael in de vorm van een gedicht of verhael over et dörp. Bi'jheurend lesmateriaol kan download wodden van de hiemkundewebstee. De PowerPoint wodt in 2017 op de hiemkundewebstee plaetst.

2. In 2016 bin mit mekeer twaelf exkursies organiseerd naor netuurgebieden in de woonomgeving van de leerling. Een achttal schoelen maekt elk jaor gebruik van dit speciaal exkursie-anbod. Dit jaor was d'r liekewel zo veul animo veur dat in overleg mit de exkursieleiding twaelf exkursies verzorgd binnen. Veurd dat de exkursie hollen wodt kun schoelen gebruik maeken van een speciaole PowerPoint die op de hiemkundewebstee te zien is.

3. Veur disse beide groepen wodden ok verhaelties klaarmaekt mit bi'jheurend verwerkingsmateriaol. An de haand van een tal vraogen en/of opdrachten is daorbi'j nao te gaon hoe goed de leerlingen et Stellingwarfs begriepen.

■ *Veur groep 7 en 8:*

1. Veur groep 7 en 8 wodde warkt an een speciaole PowerPoint daor op veul historische elementen op te zien binnen uut elk dörp van vroeger. Veur de PowerPoint zorgen Jan Koops en Jan de Vries n.a.v. heur boek Stellingwarf in oolde beelden. In de PowerPoint is d'r ommedaenken veur de tael in de vorm van een gedicht of verhael over et dörp. Bi'jheurend lesmateriaol kan download wodden van de hiemkundewebstee. De PowerPoint wodt in 2017 op de hiemkundewebstee plaetst.

2. In 2016 bin mit mekeer twaelf ekskursies orgeniseerd naor netuurgebieden in de woonomgeving van de leerling. Een achttal scholen maekt elk jaor gebruik van dit speciaal ekskursie-anbod. Dit jaor was d'r liekewel zoveul animo veur dat in overleg mit de eksursieleiding twaelf ekskursies verzorgd binnen. Veurdat de eksursie holen wodt kun schoelen gebruik maeken van een speciaole PowerPoint die op de hiemkundewebstee te zien is.

3. D'r is een begin maekt mit et projekt 'De Friese Waterlinie'. De opzet daorveur is in grote lijnen vaastesteld.

*Biezondere projekten*



1. In et verslagjaor wodde op twie basisschoelen een biezunder projekt holen rond et schrieven van gedichten in de eigen tael. Dat gebeurde in saemenwarking mit de Friese uitgeveri'je Frysk en Frij. Veur et jaor 2018 - dan is Liwwadden ien van de Europese kulturele heufdplakken - zocht Frysk en Frij naor gedichten mit et thema 'Heufdzaeke'. Schrievers, mar ok schoelen bin vraogd om gedichten te schrieven in de eigen tael. Die gedichten bin en wo'n plaetst op een speciaole webstee van Frysk en Frij; een tal d'r van zal laeter bundeld wodden. Veur de schoelen wodde een speciaole warkwinkel orgeniseerd, waarbi'j keunstener en dichter Matty de Vries an de slag gaot mit et schrieven van gedichten. Twie schoelen in Oost-Stellingwarf deden mit verschillende groepen mit; in 2017 wodt de warkwinkel geven op twie schoelen in West-Stellingwarf.

2. De Stellingwarver Schrieversronte gaf in et verslagjaor o.e. et boek *De sprokies van Grimm in et Stellingwarfs* uut. De prissentaoisie van et boek was op de Meester K.M. Dijkstraschoele van Else. Tiedens de prissentaoisie konnen de leerlingen van groep 5 en 6 vraogen stellen an de vertaelers, de twie keunsteners die veur de illestraosies en opmaek zorgden en de uitgever van et boek. De eerste exemplaoren wodden deur een leerlinge uutrikt an de wethoolders van kultuur van de beide Stellingwarver gemienten. Uut et boek wodde veurlezen deur Femmie van Veen. De leerlingen van Else hebben ommeraek geneuten van de verhaelen én van de gelegenhied om vraogen te stellen an de mitwarkers.

3. In et verslagjaor wodde een begin maekt mit de ontwikkeling van een kursus Stellingwarfs veur de ooldste leerlingen van et Comperio College. Dat gebeurde op verzuuk van en in overleg mit iene van de leerkrachten .

*(Foto's: Lenus v.d. Broek)*

4. Op verzuuk van Stichting Ons Bildt dee de Buttingeschoele van Oosterwoolde mit an een eer gedichte-projekt. In et kader van Liwwadden kulturele heufdstad wodde een gedichteprojekt veur schoelekiender opzet mit Malta - ok de Maltese heufdstad Valletta is in 2018 kulturele heufdstad. Vanwegens de onderlinge kontakten deur de verbouw van pooteerdappels en eeteerdappels ontston et idee hierveur. De gedichten over eerdappels die deur Bildtse, Stellingwarver en Friese kiender schreven binnen, bin in de haast mit de pooteerdappels mitgaon naor Malta. Basisschoeleleerlingen van Malta schreven heur gedichten, die in et veurjaar van 2017 weer naor Et Bildt kommen. Veur de uutwisseling van gedichten zal nog op een naoder te bepaolen wieze in 2018 ommedaenken wezen.

*Hiemkundewebstee [www.heemkunde-stellingwerf.nl](http://www.heemkunde-stellingwerf.nl)*

De speciaole webstee [www.heemkunde-stellingwerf](http://www.heemkunde-stellingwerf) veur et basisonderwies wodde de hieltied veerder uutbreided. Alle lesmateriaol wodt plaetst deur vaaste vri'jwilliger en ooldonderwiezer Klaas Dijkstra, die ok zels infermetieve stokken over bi'jglieks de geschiedenis ontwikkelt. Niet allierend et ni'jste lesmateriaol wodt plaetst, mar ok lesmateriaol dat eerder ontwikkeld wodde. Dat wodt digitaliseerd deur ok een veurmaolige leerkracht basisonderwies en now as vri'jwilliger aktief bi'j de Stellingwarver Schrieversronte.

*Projekt KEK en de Hiemkundemiddag*

In et verslagjaar was hiemkundemitwarkster Sietske Bloemhoff ok betrokken bi'j verschillende veurleesprojekten en bi'j et overleg mit ere aanbieders van lesmateriaol zoas de coaches van KEK (keunst- en kultuuredukaasie). Dat projekt wodde in oonze regio dreugen deur drie instaansies: Stichting Kunst en Coö, de biebeltheken en de Stellingwarver Schrieversronte. Elke instaansie hadde een eigen coach; de drie coaches zorgden inhooldelik veur et projekt. Veur de Stellingwarver Schrieversronte was dat Willy Bergsma, ofkomstig uut Liwwadden. Omreden et projekt in 2016 ofleup wodde op woensdag 30 september de jaarlikse hiemkundemiddag veur et onderwiesend passienel in Stellingwarf koppeld an de ofslutende middag van et KEK-projekt. Tiedens die middag is d'r altied ommedaenken veur et ni'jste lesmateriaol en is d'r tied veur vraoge en aanbod.

*Projekt De Veerkieker*

In overleg mit de drie coaches van et basisonderwiesprojekt KEK wodde in et naojaar van 2016 een vervolprojekt ontwikkeld. Et projekt zorgt d'r veur dat tiedens heur basisschoeleperiode alle leerlingen jaarliks een eksursie maeken naor een kultuurinstituut. Et doel is dat kiender daornao weet hebben van wat d'r an kultureel arfgoed in heur leefomgeving is. Veur de ontwikkeling van de 'De Veerkieker', die uut aende gaon kan deur een subsidie van et Fonds Ooststellingwerf zorgen Willy Bergsma, Wikje Haan en Marjolein Spitteler.

*Projekt Daor klept de klokke weer*

In et verslagjaar wodden de warkzesheden veur de te ontwikkelen film 'Daor klept de klokke weer' opstart. N.a.v. et boek mit dezelde titel wodde et skript schreven en veur een tiedspad zorgd. De film, die bedoeld is veur de ooldste leerlingen van et basisonderwies en de leerlingen van et vervolgonderwies, zal in 2018 klaar wezen. Veur financiële steun zorgen de perveensie, Fonds Ooststellingwerf en Stichting Bercoop Fonds.

### **B 3. TOMKE**

In meie verscheen veur de tiende keer de Stellingwarver edisie van *Tomke*. Tomke is de naeme van een leesbevodderingspergramme veur ukken in Frieslaand, dat in een saemenwarkingsverbaand mit de Afûk ontwikkeld wodt. Veur de Stellingwarver vertaeling zorgde Sjoukje Oosterloo. Van et Stellingwarver Tomke-boekien wo'n ieder jaar 1000 exemplaoren drokt, alle ukken in de Stellingwarver kriegen et boekien deur de Schrieversronte ommenocht anbeuden. **Beriek: omdebi'j 900**

Dit jaar wodde veur de negende keer mitdaon an et veurleesprojekt Tomke dat in juni hopen wodt. Zowat alle ukkespeulplakken en plakken veur kienderopvang in Stellingwarf doen hier an mit. Zo'e'n twintig vri'jwilligers zetten heur hierveur in. De koördinaasie wodde verzorgd deur de vri'jwilligers Wikje Haan en Akkie Zeilstra. De aktie wodt in gezaemelikhied uutvoerd mit 'It Selskip foar Fryske tael en schriftekennisse'. Rond de 800 ukken kommen zo mit et Stellingwarfs in anraeking. **Beriek: omdebi'j 800**

### **B 4. DE VERTELKOFFER EN DE VERTELJASSE**

De Stellingwarver Schrieversronte dot sund 2014 mit an et vertelprojekt 'De vertelkoffer' van Tresoar en ontwikkelde zels et projekt 'De verteljasse'. Beide projekten bin veural bedoeld veur et basisonderwies, mar ok ukkespeulplakken kun van de projekten gebruik maeken.

## C 1. PUBLIKAOSIES

In 2016 konnen de volgende boeken uitgeven wodden:




### 1. De Ovend

In 2016 verscheen de 44<sup>e</sup> jaorgaank van et tiedschrift *De Ovend* mit zes nummers. Alle zes nummers van *De Ovend* telden 32 bladzieden in een oplaage van 1150 stoks. De redaktie beston uut Jan Koops en Jannes Westerhof, wiels de bureoredaktie in hanen was van Sietske Bloemhoff. Trijnie Telkamp zorgde t/m nommer vufe veur de tekstverwerking en de vormgeving van et tiedschrift. Vanaf nommer zesse 2016 is dit wark uutbesteded an vormgever Bauke Visser Koenders van Haulerwiek. Et tiedschrift wodt drokt en verstuurd deur Pijper Media in Grunningen.

### 2. Jongesjaoren, Gerrit Hof

Dit boek ston in et warkplan veur 2016, mar verscheen al in 2015. Doe Gerrit Hof (1942-2012) uut de tied raekte leut hi'j een verzaemeling verhaelties nao waar as hi'j in vertelt over zien jeugd in Berkoop. In 'Jongesjaoren' bin een flink tal daarvan opneumen; et boek gefte een prachtig tieldsbeeld van een Stellingwarfs dörp kot nao de Twiede Wereldoorlog. An et aende van et jaor 2015 zol et boek al uutverkocht raeken. (Oplaage **350** stoks)

### 3. Op 'e luuster staon, cd mit verhaelen



Op 'e cd van dit mediaboekien bin verhaelen van H.J. Bergveld, Johan Veenstra en Klaas van der Weg te heuren. As ofwisseling bin butendat een tal lieties van Henk Bloemhof opneumen. Et mediaboekien is koppeld an et veurleesprojekt veur oolderen zoas dat al een stokmennig jaoren lopt, en dat now, deur financiële steun van Stichting Bercoop Fonds, veerder uitgebreid wodden naor de kleine dörpen. De cd's bin uutdiel an alle Stellingwarver zorginstellings. Ok bin een kleine honderd stoks deur een gemientelike instelling uutrikt an een groep maantelzorgers. De cd wodt ok in de losse verkoop anbeuden. (Oplaage **500** stoks)

### 4, 5 en 6. Fietsen door het stroomgebied van De Lende, 3 delen



Vlak veur de jaarlikse sutelaktie van de Stellingwarver Schrieversronte verschenen de eerste twee dielen van de routegids 'Fietsen door het stroomgebied van De Lende'. De serie wodde schreven deur Geert Lantinga van Wolvege. Et eerste diel van de serie gaot deur et gebied tussen Tronde en De Hoeve en is 40 km; et twiede diel beschrift de route tussen De Hoeve en Blesdieke en is 36 km. Diel verscheen op 15 december en gaot deur et westelike diel van et stroomgebied van de revier. Disse route is 45 km. De routes sluten goed op mekeer an; et is meugelik om van de iene fietsroute veerder te gaon mit de volgende. De gidsen, die Neder-

laanstaelig binnen, bin op busefermaat en tellen elk 64 bladzieden. Ze bin veurzien van veul kulturhistorische infermaosie en unieke foto's. In de omslaegen, die as uutklapt wodden kund, bin gebiedskaorties van de routes opneumen. (Oplaage van elk **500** stoks)

### 7. Sprokies van Grimm in et Stellingwarfs



In de naozommer van 2016 verscheen d'r een Stellingwarver verzaemeling van de wereldberoemde sprokies van de gebroeders Grimm: Sprokies van Grimm in et Stellingwarfs. Et gaot om een ni'j diel in een serie van de Grimmsprokies in kleine taelen. Eerder verschenen al een Friese, een Bildtse en een Grunninger vertaeling. Veur de Stellingwarver vertaeling zorgden Sietske en Henk Bloemhoff; et boek wodde in een goeie saemenwarking uitgeven mit Taalbuuro Popkema uut Grunningen. (Oplaage van **350** stoks)

## 8. (Volks)verhaelen uut Appelsche, Wiebe de Jong

In et naojaor van 2016 wodde uut aende zet mit een boek mit (volks)verhaelen van Wiebe de Jong van Appelsche. De verhaelen gaon mit naeme over de omgeving van de buurtschop Hildenbarg. Et boek wodt veurzien van biezondere foto's uut et gebied; die bin allemaole beschikber steld deur de Historische Veriening Appelsche e.o. Et boek zal in et veurjaor van 2017 prissenteed wodden. (Oplaoge van **350** stoks)

## 9. Luudklokken en klokkestoelen van Stellingwarf

Dit jaor wodde d'r warkt an et boek 'Luudklokken en klokkestoelen van Stellingwarf'. In et boek wo'n alle veurkommende luudklokken beschreven deur Jan Koops van Oosterwoolde; et diel over de klokkestoelen is een bewarking van et eerder verschenen boek 'Klokkestoelen van Stellingwarf', deur Sietske Bloemhoff. Et boek zol in 2016 verschienen, mar deur extra onderzuuk is dat niet lokt. Et boek verschient now in et naojaor van 2017.

## 10. De kultuur- en netuurhistorie van et Fochtelervene

In eerste opzet wodde maekt veur dit biezondere boek daor alle aspekten van et gebied in naor veuren kommen zullen. Deurdat an dit boek meerdere auteurs mitwarken kon et nog niet in et verslagjaor verschienen.

## 11. Verka, een medern sprokien

In de meertmaond is d'r in et noorden van Nederland vaeks extra ommedaenken veur et gebruik van (streek)taelen. D'r bin gemienteraoden die in de streektael vergeerderen en d'r bin karkediensten in de eigen tael. Et sprokien 'Verkã, Wolf en de zeuven geities' is een ni'jmoodse wieze om et gebruik en de schoonhied van (streek)tael te belochten. Gerard Stout, schriever uut et Drentse Peize, herschreef sprokies van de gebroeders Grimm. Hi'j vun acht vertaelers veur zien sprokies. In et boekien staon daoromme vertaelings in et Engels, Fraans, Duuts, Westerkertiers (een Grunninger streektael), Plattduuts, Zuudoost-Drents, Riestendrèents én in et Stellingwarfs. Veur die vertaeling zorgde Sjoukje Oosterloo. Et boekien (POD) kan op verzuuk leverd wodden.

## 12. Stellingwarver Zaeken

Veur de regionaole kraanten *Nieuwe Ooststellingwerver* en *Stellingwerf* wodde ien keer in de drie weken zorgd veur de bladziende *Stellingwarver Zaeken*. Et redaktie- en korrektiewark veur disse ni'js- en verhaelebladziende is in hanen van Sietske Bloemhoff, vaaste mitwarkers bin Roely Bakker, Christine Mulder, Sjoukje Oosterloo, Henk Bloemhoff, Harmen Houtman en eren. De kraanten wo'n deur zoe'n **10.000** meensken lezen.



*Tiedens de rondleiding op 8 meert kreeg Twiede Kaemerlid Lutz Jacobi van veurzitter Ype Dijkstra twee uutgiften van de Stellingwarver Schrieversonte. Et gong om et kienderboek 'Over grote beren en knuffels' dat in december verschenen was en et mediaboekien dat twee daegen laeter officieel prissenteed wodden zol.*

*(Foto: Lenus v.d. Broek)*

## C 2. TAELESTIMULERENDE EN AANDERE AKTIVITEITEN

In 2016 bin weer verskillende taelstimulerende en aandere aktiviteiten ofsleuten en ni'je op gang brocht:

### 1. Aktiviteiten

- Op 23 jannewaori was de **twiejaarlikse kulturele ni'jjaorsaovend** van de stichting in et MFA van Berkoop. Klaasje Herder vertelde twie volksverhaelen van Wube Lamers van de Kuunderwal, de muzikaole invulling kwam van zangroep 'k Wait nait en de Scheve Schaatsband. **Bezokers: 80**
- Op 17 feberwaori woonden veurzitter en direkteur **uutrikkinge van de Rink v.d. Veldepries** in Drachten bi'j. Veur die pries wodde et boek 'Een vrouw van ivoor' van Johan Veenstra nommeneerd. **Belangstellenden: rond de 50**
- Op 8 meert gong op uutneudiging van Twiede Kaemerlid Lutz Jacobi een grote groep sutelders veur een rondleiding in de Twiede Kaemer naor Den Haag. Dat gebeurde omreden Lutz Jacobi mithelpt an de Stellingwarver sutelaktie en daor arg enthousiast veur is. Et belang van zoe'n uutstappien veur vri'jwilligers veur de SSR is van belang. Et onderstreept en starkt de onderlinge biending. **Dielnemers: 35 sutelders**
- Op 10 meert wodde veur geneudigden uut de doelgroep et **mediaboekien Op 'e luuster staon** prissenteed. Op 'e cd van et mediaboekien bin verhaelen van H.J. Bergveld, Johan Veenstra en Klaas van der Weg te heuren. As ofwisseling bin op de cd butendat een tal lieties van Henk Bloemhof opneumen. Et mediaboekien is koppeld an et veurleesprojekt veur oolderen zoas dat al een stokmennig jaoren lopt. Et projekt kan deur financiële steun van Stichting Bercoop Fonds veerder uitgebreid wodden naor de kleinere dörpen. **Geneudigden prissentaoisie : 30, beriek extra oolderen: minstens 200**
- Op 3 april woonden veurzitter Ype Dijkstra, bestuurslid Geke Zanen en direkteur Sietske Bloemhoff in Roden de **uutrikkinge van de Streektaelpries van et Dagblad van et Noorden** bi'j. Winner wodde Johan Veenstra mit zien roman 'Een vrouw van ivoor'. **Belangstellenden: rond de 200**
- Vanof 2 meie t/m juni kon tiedens de kantooruren van de Stellingwarver Schrieversronte de exepisies 'Zwarven deur de Stellingwarven' van Annie Ligthart bezocht wodden. **Belangstellenden: 250**
- Op 11 juni ston et gebou van de Schrieversronte in et teken van et **bridgeweekaende** bi'j Hotel Lunia. Dielnemers an et weekaende kwammen zo ok in de kunde mit et wark van de Stellingwarver Schrieversronte. **Belangstellenden: 100**
- Van 23 juli t/m 21 augustus stelde de stichting, krek as veurgaonde jaoren, weer de grote zael van et gebou beschikbaar veur de **keunstroute Eupen Stal**. In de hal van et gebou is d'r in die periode extra ommedaanken veur de uitgeveri'je van de stichting. Alle daegen vertelden vri'jwilligers over et Stellingwarfs en de streekkultuur van et gebied. **Bezokers: jaarliks tegen de 10.000**
- Op 29 augustus gong **de 42e sutelaktie** uut aende. De sutelaktie wodde eupend deur een jaorenlaank trouwe sutelder en ondertussen iene van de ooldsten: Henk Veen (82) van Oosterwoolde. Jaarliks bin zoe'n 80 vri'jwilligers betrokken bi'j de organisaosie van de de sutelaktie om daor een sukses van te maeken. Mit de sutelaktie wo'n jaarliks **roem 16.000 meensken** benaoderd en kommen (opni'j) in de kunde mit et Stellingwarfs.
- Op 2 september was in de schoele van Else de prissentaoisie van et boek '**De sprokies van Grimm in et Stellingwarfs**'. De eerste exemplaoren van et boek wodden deur SSR-veurzitter Jan Baas uutrikt an leerlinge Femke Prakken en an de beide Stellingwarver kultuurwethoolders, de heren Sierd de Boer van Oost-Stellingwarf en Frans Kloosterman van Stellingwarf-Westende. **Belangstellenden: 40**
- Op 16 september hul de Stellingwarver Schrieversronte een gezaemelike **literaire aovend** mit de Fryske Krite van Oosterwoolde. De aovend wodde organiseerd vanwegens et ofsluten van de sutelaktie en de Friese boekemaond. De aovend wodde verzorgd deur Freddie de Vries en Gjalte de Groot. **Bezokers: 60**
- Op 25 september hul de Stellingwarver Schrieversronte een **fietstocht mit verhaelen** mit verhaelen. Tiedens de tocht vertelden Klaas Dijkstra, histotolk Frank Spijkers, Johan Veenstra en Femmie van Veen oolde volksverhaelen of uut eigen wark. **Dielnemers: 30**

- Op 30 september wodde in et buurthuis van Noordwoolde de **Baskische film Amama** Amama vertoond. De film is veurzien van een Stellingwarfstaelige ondertiteling, daorveur zorgde Henk Bloemhoff van Oosterwoolde. Amama wodde dri'jd in et kader van de dag van de Europese taelen op 26 september. **Bezukers: 25**
  
- Op 8 oktober was d'r in De Zon in Oosterwoolde een **gezaemelike kulturele aovend** mit Stichting Kunstwerf. Disse aovend wodde de biezondere film Amama vertoond en was d'r extra ommedaenken veur et waaromme van et vertaelen d'r van en et belang van de kleine taelen. **Belangstellenden: 60**
  
- Op 14 oktober was de eupening van een biezondere tentoonstelling over 30 jaor **Hiemkunde in et basisonderwies**. Bij de eupening hul de heer Jan de Vries, die veur zien pensionering as heufd ofdieling Onderwies in West-Stellingwarf him jaorenlaank inzette veur dit vak, een inleiding. **Belangstellenden: 40**
  
- Op 17 oktober was in et gebouw van de Stellingwarver Schrieversronte de uutrinkinge van de **H.J. Bergveldpries**. Op veurdracht van de jury kende et bestuur van de Stellingwarver Schrieversronte de H.J. Bergveldpries 2016 toe an Freddie de Vries en Ruurd Jelle van der Leij, schriever en fotograaf van Et Stellingwarver Voegelboek. De dudelike, toegankelike wieze van et beschrieven van al die voegels, et prachtige fotomateriaol en een register mit naost de Stellingwarver naemen ok de naemen in et Nederlaans en Latien maekt dit boek biezunder en uniek. **Belangstellenden: 75**
  
- Op 12 november wodde in De Miente in Oosterwoolde et **Stellingwarfs Meziekfestival** holen. Mit mekeer acht dielnemers melden heur veur et festival an. Winner wodde de zanggroep 'k Wait nait. mit et lied 'Stellingwarfs bedrog'. Ok de lekaole omroep Odrie was betrokken bij de organisaosie en het et festival rechtstreeks uutzunen. **Belangstellenden: 120**
  
- Op 14 december was in et gebouw van de Stellingwarver Schrieversronte de prissentaoisie van et dadde diel van de serie routegidsen '**Fietsen door het stroomgebied van De Lende**' van Geert Lantinga. Deur bestuurslid Hendrik Fokkema wodde daor et eerste exemplaar van et dadde diel uutrikt an kultuurwethoolder Sierd de Boer van Oost-Stellingwarf. **Belangstellenden: 40**



*Fietsen en luusteren naor verhaelen (foto: Lenus v.d. Broek)*



*'k Wait nait' winner meziekfestival (foto: Lenus v.d. Broek)*



## 2. De websteden Stellingwarfs.nl, Stellingplus.nl, Stellingia.nl en Facebook

### *Stellingwarver-schrieversronte.nl*

Stellingwarver-schrieversronte.nl is de overkoepelende webstee van de al bestaande drie websteden. Veur et beheer van alle websteden zorgt Albertjan Leupen.

### *Stellingwarfs.nl*

De redaktie van de algemiene webstee Stellingwarfs.nl (**www.stellingwarfs.nl**) wodt op vri'jwillige basis verzorgd deur Henk Bloemhoff. In 2016 steeg et tal kiekers opni'j mit zowat 1.200 unieke bezukers naor 8.634.

**Tal unieke bezukers in 2016: 8.634**

### *Stellingplus.nl*

In 2016 warkte webmaster Ninke van der Veen weer drie uren in de maond an et veerder uutbouwen van de webstee StellingPlus en an de veerdere ontwikkeling van www.stellingia.nl. De webstee **www.stellingplus.nl** is mit naeme bedoeld veur een bried aanbod op et gebied van de Stellingwarver streektael en streekkultuur. Mit naeme de rebriek 'Stellingwarfs in 't wild' is een rebriek daor veul naor keken wodt. In 2016 gruuide et tal unieke bezukers van 2.478 in 2015 naor 4.700 in 2016. De redaktie van StellingPlus wodt verzorgd deur Sietske Bloemhoff. **Tal unieke bezukers in 2016: 4.700**

### *Stellingia.nl*

De webstee **www.stellingia.nl** is et digitale Kenniscentrum van de Stellingwarver Schrieversronte. In et verslagjaar wodden niet alliend opni'j boeken digitaliseerd en plaetst, mar ok een tal biezondere kollekties en onderwiesmateriaol. In 2015 gong disse webstee mit 928 unieke bezukers uut aende, in 2016 kwammen d'r 776 bi'j en gruuide et tal naor 1.604. **Tal unieke bezukers in 2016: 1.604**

### *Facebook*

Sund begin 2015 het de Stellingwarver Schrieversronte ok een eigen Facebookbladziede. Twie keer in de weke wo'n daor sund die tied de laeste berichten op plaetst deur mitwarkster Immy Sloot. Et bliekt dat de hieltied meer meensken mit Facebook berikt wodden. Soms gaot et om over de 3.000 personen die op disse wieze mit et Stellingwarfs en de aktiviteiten van de Stellingwarver Schrieversronte in anraeking kommen.

## 3. Projekt Veurlezen op ukkespeulplakken

Veur de negende keer organiseerde de Stellingwarver Schrieversronte een veurleesaktie in zowat alle ukkespeulplakken en plakken veur kienderopvang in de beide Stellingwarven. Zoe'n twintig vri'jwilligers zetten heur in veur disse taelstimulerende aktie, die koördineerd wodt deur de vri'jwilligers Wikje Haan en Akkie Zeilstra. In anraeking mit et Stellingwarfs kommen zo omdebi'j **900 ukken**

## 4. Eupen Stal

Tiedens de vier weken durende tentoonstelling 'Eupen Stal' was d'r in et gebouw van de Schrieversronte dit jaor gien extra aktiviteit. Wel was in de hal extra ommedaenken veur alle uutgiften van de Stellingwarver Schrieversronte. Vri'jwilligers hulpen mit om de hieltied tekst en uutleg over de aktiviteiten van de Stellingwarver Schrieversronte en de uitgeveri'je geven te kunnen. **Beriek: tegen de 10.000**

## 5. Stellingwarfs Meziekfestival

De organiserende kemmissie van et Stellingwarfs Meziekfestival kwam in 2016 opni'j extra bi'j mekere om veur een veerdere verni'jing van dat festival te zorgen. Dit jaor wodde et festival holen in et aktiviteitencentrum De Miente in Oosterwoolde. Dat bleek een schot in de roze, et centrum voldee ommeraeke goed. Veur et festival gaven heur acht dielnemers op; ien groep mos vanwegens ziekte ofhaoken. De jury beston uut Philomène Bloemhoff, Gerda Hoogeveen en Appie van Riezen. Veur de prissentasie zorgde Anna Span. **Tal bezukers festival: 120**

## 6. Ofsluting Stellingwarver en Friese boekemaond

Op 16 september hul de Stellingwarver Schrieversronte een gezaemelike literaire aovend mit de Fryske Krite van Oosterwoolde. De aovend wodde organiseerd vanwegens et ofsluten van de sutelaktie en de Friese boekemaond. De aovend wodde verzorgd deur Freddie de Vries en Gjalt de Groot. **Bezukers: 60**

### 8. Veurleesweke veur oolderen

Veur de negende keer gongen, dit keer in meert vanwegens de prissentasie van et mediaboekien 'Op'e luuster staon', zo'e'n twintig vri'jwilligers veurlezen in de verschillende verzorgingstehuzen in de Stellingwarven en in De Menning in Wilhelmina-oord. Alle instellings kregen een mediaboekien uutrikt en een ni'je veurleesmappe. Beide kun dan op alle meugelike mementen deur de instellings zels bruukt wodden. De koördinasie wodt alle keren verzorgd Schrieversronte-mitwarkster Immy Sloot. **Tal belangstellenden: omdebi'j 250**

### 9. Streekmarken, boekemarken en streekfestivals

Deur et hiele jaor henne was de Schrieversronte op tal van streekmarken en streekfestivals anwezig mit een info- en/of verkoopkraam, die alle keren bemand wodde deur vri'jwilligers. Tal meensken dat op disse wieze in anraeking komt mit et Stellingwarfs en de Stellingwarver streekkultuur: **roem 4000 personen**



*De Stellingwarver veurleesaktie veur oolderen is alle jaoren weer een sukses. De aktie kon dit jaor, deur financiële steun van Stichting Bercoop Fonds veerder uitgebreid wodden (foto: Lenus v.d. Broek)*

## C 3. ONTWIKKELINGSUREN NI'JE DOELGROEPEN

In 2016 wodde weer mit tal van verschillende ere instellings saemenwarkt.

### 1. Stellingwarf Kultureel

Ieder jaor is d'r ien of twee keer et overleg 'Stellingwarf Kultureel' mit de Vereniging Historie Weststellingwerf, de Ooldhiedkaemer (West-Stellingwarf) en 't Vlechtmuseum Noordwoolde. Op die wieze holen de vier instellings kontakt mit mekere en wo'n alderhaande zaeken daor alle viere mit te maeken hebben (kunnen) bepraot. Omreden de Ooldhiedkaemer, mar ok 't Vlechtmuseum mit biezondere omstanigheden te maeken kregen, bin de bi'jienkomsten ok in 2016 uutsteld tot laeter.

### 2. Alles rondom taal

Tegere mit Klaasje Herder (biebeltheken Oost-Stellingwarf) en Femke Adams (boekhandel Bruna) vormt Sietske Bloemhoff de literaire warkgroep *Alles rondom taal*. Die warkgroep, die onderdiel is van Stichting Kunstwerf, organiseerde in de kienderboekeweke van 2016 opni'j een tal warkwinkels haandboekebienen veur kiender. **Beriek: 160 leerlingen**

### 3. Saemenwarking mit Afûk

#### a. *Tomke*

Ok in 2016 kon deur een goeie saemenwarking over en weer et boekien veur ukken *Tomke* verschienen. De Stellingwarver Schrieversronte verspreidet et boekien ommenocht onder alle (zoe'n 900) ukken van Stellingwarf. Veur de vertaeling zorgde opni'j Sjoukje Oosterloo. **Beriek: omdebi'j 900 ukken**

### 4. Saemenwarking mit Tresoar

#### a. *Warkwinkel Lietteksen*

In 2016 wodden de meugelikheden veur een gezaemlike warkwinkel 'Lietteksen' mit anslutend een festival Liwwadden veerder bepraot. Bi'j dat overleg is ok Stichting Ons Bildt betrokken. Laeter is ansluting zocht mit Stichting Liet. Veurofgaonde an et festival 'Liet' kon in 2016 de warkwinkel suksesvol geven wodden. Veur et Stellingwarfs gaf Harmen Houtman advies bi'j et schrieven van teksten.

#### b. *De Vertelkoffer*

'De vertelkoffer' veur et basisonderwies wodt i.s.m. Tresoar anbeuden.

#### c. *Digitalisering*

In een professioneel opzet digitaliseringsprojekt van Tresoar angaonde Friese literatuur, zal ok de Stellingwarver literatuur mitneumen wodden, zo is in 2013 ofpraot. Ien en aander is in 2016 nog niet van de grond kommen, wat et Stellingwarfs angaot.

### 5. Saemenwarking mit Fryske Akademy

Tiedens een overleg in 2012 angaonde meer saemenwarking, wodde doe konstateerd dat op et gebied van et wetenschappelik onderzook d'r zeker meugelikheden weren. Et risseltaot is dat in de twiede helte van 2013 dr. Henk Bloemhoff ansteld is bi'j de FA as gaastonderzoker lexikografie en veldnaemekunde. Ok in 2016 warkte Bloemhoff veerder an de digitalisering van et Stellingwarfs Woordeboek en et zorgen veur diel VII van de veldnaemeserie *De veldnaemen van Oosterwoolde*.

### 6. Saemenwarking mit ere Nedersaksische taelinstituten en SONT

Mit de ere Nedersaksische streektaelinstellings van Noordoost-Nederlaand en Stichting SONT was d'r dit jaor ok now weer mit een zekere riegelmaat kontakt. Dat kontakt was d'r mit naeme angaonde de staand van zaecken rond de veerdere erkenning van et Nedersaksisch.

### 7. Saemenwarking mit Historische Verienings

Behalven de gewone kontakten mit de Historische Verienings zoas die van Haulerwiek en de Vereniging Historie Weststellingwerf was d'r mit naeme saemenwarking mit de H.V. Appelsche en H.V. Oosterwoolde e.o. Zo wodde i.s.m. de H.V. Appelsche de kursus 'Stellingwarfs veur beginners' organiseerd en was d'r mit de H.V. Oosterwoolde veerder overleg angaonde et utgeven van een boek over de veldnaemen van Oosterwoolde. Dit boek zal in 2017 verschienen gaon. **Beriek: 50**

### 8. Projekt toerisme in Stellingwarf

De Stellingwarver Schrieversronte wodt mit riegelmaat vraogd naor alderhaande toeristische meugelikheden in et gebied. Mit mekeer bin now tien routegidsen utgeven; de volgende twee zullen in 2017 verschienen. **Beriek: 1.250 personen**

## D 1. BESTUURS- EN ORGANISAOSIE-ONDERSTEUNING

Veur de bestuurs- en organisaosie-ondersteuning zorgt de direkteur van de stichting. Dat betekent in de praktijk dat et bestuur goed op de hoogte hopen wodt mit de lopende aktiviteiten en de ni'je plannen. Zo is d'r maandeliks een ofstemmingsoverleg mit de veurzitter en ponghoolder, d'r wodt zorgdreugen veur et veurbereiden van de bestuursvergeederings en de jaervergeederings, en d'r wodt zorgd veur et leggen van de neudige kontakten mit de overheden en ere subsidiegevers.

De direkteur gefte uteraord ok de daegelikse leiding an et ere passeniël van de stichting, ien keer in de maand is d'r een warkoverleg. Daornaost wodt veur de neudige koördinaosie zorgd van alle vri'jwilligersaktiviteiten.

Om de almar groter woddende organisaosie goed dri'jen te laoten wodden in et verslagjaar meer as 16 uren in de weke besteded.

## D 2. VRI'JWILLIGERSAKTIVITEITEN

### 1. Kenniscentrum

Dit verslagjaar beston et tal 'vaaste' vrijwilligers veur et Kenniscentrum opni'j uut zeuven meensken. Mit vaaste vri'jwilliger wodt bedoeld dat meensken ien of meer dagdielen naor de instelling kommen en heur inzetten veur de Stellingwarver Schrieversronte. De groep zet him mit naeme in veur et herorganiseren van et Kenniscentrum, et digitaliseren daarvan en et plaetsen van et digitaliseerde wark op de webstee Stellingia.nl. Vanof jannewaori 2015 bin de ciefers angaonde de unieke bezukers van de ni'je webstee bi'jholen. **Beriek: 1.028 personen**

### 2. Sutelaktie 2016

De sutelaktie van 2016 brocht een bedrag op van roem € 8.000,- Deur verschillende oorzaeken weren d'r dit jaar wat minder sutelders, en dat levert mitien een leger verkoopbedrag op. Per kroje wodt nog de hieltied veur etzelde bedrag an boeken, cd's en kelenders verkocht. **Beriek: roem 16.000 personen**

Toppers in de verkoop weren de Stellingwarver Spreukekelender, et boek 'Een vrouw van ivoor' van Johan Veenstra en de ni'je serien van drie routegidsen deur et stroomgebied van De Lende.

### 3. Boeekraante 'Twie pond 'n stuver

De warkgroep Publiciteit zorgde weer veur genoeg adverteerders om de jaarlikse boeekraante in een oplaoge van 25.000 stoks verschienen te laoten. De huus-an-huuskraante in Oost- en West-Stellingwarf verscheen veur de 36e keer en beston uut zestien bladzieden. Et redaktiewark wodde, krek as veurgaonde jaoren, uutbesteded. In de kraante is d'r alle keren veul ommedaenken veur de ni'jste uutgiften, mar d'r bin ok altied interviews mit o.e. schrievers in opneumen. **Beriek: roem 50.000 personen**

### 4. Stellingwarver Spreukekelender

In meie verscheen bi'j uitgeveri'je Van de Berg in Almere de Stellingwarver Spreukekelender veur et jaar 2017. Omdat de redaktiekosten deur die uitgeveri'je dreugen wodden, bestedet de Schrieversronte gien uren an dit taelbevodderende projekt. De kelender wodde saemensteld deur Sietske Bloemhoff, die van een flink tal vaaste mitwarkers ofwisselende kopie kregen. Die mitwarkers in 2016 weren Roely Bakker, Koosje Hornstra, Harmen Houtman, Henk Jager, Kees Koopstra, Attie Nijboer, Sjoukje Oosterloo, Frank Spijkers en Freddie de Vries. **Beriek: 2.000 personen**

### 5. De ledestaand

De ledestaand per 31 december 2016 is 947.

Et bestuur het et veurnemen om deur te gaon mit speciaole ledewinakties, zoas die de laeste peer jaar, suksesvol, hopen wodden tiedens bi'jglike de Stellingwarver Dag.

## ET JAOR- EN PRODUKTVERSLAG 2016 VAN DE STICHTING ET BOEKEFOONS

Stichting Et Boekefoons,  
Willinge Prinsstraote 10,  
8421 PE Berkoop/Oldeberkoop

### Saemenstelling bestuur in december 2016

<b>Veurzitter:</b>	Ype Dijkstra (t/m 12 meie), Oosterwoolde Jan Baas (vanof 12 meie), De Oosterstreek
<b>Siktaoris:</b>	Hendrik Fokkema, Sunnege
<b>Ponghoolder:</b>	Henk Koelma (t/m 12 meie), Hooltpae Gerda Hoogeveen (vanof 12 meie), De Fochtel
<b>Twiede veurzitter:</b>	Jan Baas (tot 12 meie), De Oosterstreek
<b>Leden:</b>	Peter Riksmā, Zandpol; Jan Russchen, Oosterwoolde; Geke Zanen-Dokter (tot 12 meie), Zuudwoolde; Hans Salverda (vanof 12 meie), Zorgvlied

### Direktie

De direktie is ienheufdig en de funktie van de direktie wodt uutvoerd deur Sietske Bloemhoff, Ni'jberkoop

### Statutaire naeme, vestigingsplak, doel

De Stichting Et Boekefoons wodde opricht op 1 oktober 1986 en kent as vestigingsplak Oosterwoolde, gemeente Oost-Stellingwarf. Doel is neffens artikel 2 van de Stichting: *1. De stichting stelt zich ten doel het Stellingwerfs als levende streektaal te handhaven en te bevorderen. 2. Zij tracht dit te bereiken door: a. het zelf uitgeven of doen uitgeven dan wel het bevorderen van het verschijnen van publicaties in het Stellingwerfs; b. het bevorderen van het gebruik van het Stellingwerfs als schrijftaal in het Stellingwarver taalgebied.*

In et jaorverslag 2004 is uutlegd waaromme as de stichting destieds opricht is. De Stichting is verantwoordelik veur de uitgifte van boeken in et Stellingwarfs en van boeken over Stellingwarf, et Stellingwarfs en alle regionaole kultuuruterings. De Stichting kan ok de saemenwarking zuken mit aandere uitgevers om publikaosies gezaemelik uut te geven of om publikaosies van aandere uitgevers te distribueren of om publikaosies van aanderen publicitair te ondersteunen.

In et jaorverslag van de Stichting Stellingwarver Schrieversronte 2016 kan onder de heufdstokken C Publikaoesies (en dan mit naeme 2. Et uitgeven van boeken) en D Vri'jwilligersaktiviteiten (en dan mit naeme sutelaktie, boeekraante en Stellingwarver spreukekelinder) lezen wodden welke aktiviteiten deur de Stichting Et Boekefoons in 2016 t.b.v. de Stichting Stellingwarver Schrieversronte uutvoerd binnen.

Et risseltaot van alle investerings en inspannings in 2016 is een konsolideerd negatief risseltaot van € 18.451 (negatief risseltaot van € 9.600 van de Stichting Stellingwarver Schrieversronte en een negatief resultaat van € 8.851 van Stichting Et Boekefoons.

## **Stichting Stellingwarver Schrieversronte, Oldeberkoop**

Aan het bestuur van  
Stichting Stellingwarver Schrieversronte  
Willinge Prinsstraat 10  
8421 PE Oldeberkoop

Wolvega, 27 maart 2017

Geacht bestuur,

Hierbij brengen wij verslag uit over het boekjaar 2016 van uw stichting. Ingevolge uw opdracht hebben wij de jaarrekening 2016 van uw stichting, waarin begrepen de geconsolideerde balans met tellingen van € 315.246 en de geconsolideerde winst-en-verliesrekening sluitende met een negatief resultaat van € 18.451, samengesteld.

### **1 BEOORDELINGSVERKLARING VAN DE ONAFHANKELIJKE ACCOUNTANT**

Wij hebben de in dit rapport opgenomen jaarrekening 2016 van Stichting Stellingwarver Schrieversronte/Et Boekefoons te Oldeberkoop beoordeeld. Deze jaarrekening bestaat uit de geconsolideerde balans per 31 december 2016 en de geconsolideerde winst-en-verliesrekening over 2016 met de toelichting, waarin zijn opgenomen een overzicht van de gehanteerde grondslagen voor financiële verslaggeving en andere toelichtingen.

#### **Verantwoordelijkheid van het bestuur**

Het bestuur van de stichting is verantwoordelijk voor het opmaken van de jaarrekening die het vermogen en het resultaat getrouw dient weer te geven in overeenstemming met de Richtlijn voor de jaarverslaggeving voor kleine organisaties zonder winststreven. Het bestuur is tevens verantwoordelijk voor een zodanige interne beheersing als het noodzakelijk acht om het opmaken van de jaarrekening mogelijk te maken zonder afwijkingen van materieel belang als gevolg van fraude of fouten.

#### **Verantwoordelijkheid van de accountant**

Onze verantwoordelijkheid is het geven van een conclusie over de jaarrekening op basis van onze beoordeling. Wij hebben onze beoordeling verricht in overeenstemming met Nederlands recht, waaronder de Nederlandse Standaard 2400, 'Opdrachten tot het beoordelen van financiële overzichten'. Dit vereist dat wij voldoen aan de voor ons geldende ethische voorschriften en dat wij onze beoordeling zodanig plannen en uitvoeren dat wij in staat zijn te concluderen dat ons niet is gebleken dat de jaarrekening afwijkingen van materieel belang bevat.

Een beoordeling in overeenstemming met de Nederlandse Standaard 2400 resulteert in een beperkte mate van zekerheid. De in dit kader uitgevoerde werkzaamheden bestonden in hoofdzaak uit het inwinnen van inlichtingen bij het management en overige functionarissen van de entiteit, het uitvoeren van cijferanalyses met betrekking tot de financiële gegevens alsmede het evalueren van de verkregen informatie.

De werkzaamheden uitgevoerd in het kader van een beoordelingsopdracht zijn aanzienlijk beperkter dan die uitgevoerd in het kader van een controleopdracht verricht in overeenstemming met de Nederlandse controlestandaarden. Derhalve brengen wij geen controleoordeel tot uitdrukking.

#### **Conclusie**

Op grond van onze beoordeling is ons niets gebleken op basis waarvan wij zouden moeten concluderen dat de jaarrekening geen getrouw beeld geeft van de samenstelling van het vermogen van SSR en Et Boekefoons per 31 december 2016 en over het resultaat over 2016 in overeenstemming met Titel 9 Boek 2 van het in Nederland geldende Burgerlijk Wetboek (BW).

## BELAANS STELLINGWARVER SCHRIEVERSRONTE EN ET BOEKEFOONS

Omschrijving	31-12-2016	31-12-2015	Omschrijving	31-12-2016	31-12-2015
<b>AKTIVA</b>			<b>PASSIVA</b>		
<b>VAASTE AKTIVA</b>			<b>Eigen vermogen</b>		
<b>Materiële vaaste aktiva</b>			Algemene reserve		
Bedrijfsgebouwen en			€ 68.136		€ 86.587
-terreinen	€ 193.601	€ 193.601	Herwaarderings reserve	€ 193.601	€ 193.601
Inventaris	€ 847	€ 1.353	-----	-----	-----
	-----	-----	€ 261.737		€ 280.188
	€ 194.448	€ 194.954	<b>Veurzienings</b>		
<b>VLOTTENDE AKTIVA</b>			Groot onderhoud veurziening		
<b>Veurraoden</b>			€ 25.226		€ 30.650
	€ 23.903	€ 24.944	Overige veurzienings	€ 7.433	€ 7.433
<b>Vodderings</b>			<b>Kotlopende schulden</b>		
Overlopende aktiva	€ 1.817	€ 6.405	Belastingen en soc.premies		
Belastingen en premies			Overlopende passiva		
soc. verz.	€ 907	€ -	=====	=====	€ 5.272
Haandelsdebiteuren	€ 438	€ 1.811	€ 315.246		€ 11.970
<b>Liquide middels</b>					
	€ 93.688	€ 107.399			
	=====	=====			
	€ 315.246	€ 335.513			

# KONSOLIDEERDE STAOT VAN BAOTEN EN LASTEN

Omschrijving	2 0 1 6		2015	2017
	Begroting	Warkelik	Warkelik	Begroting
<b>BAOTEN</b>				
<b>Stell. Schrieversronte</b>				
Subsidies	€ 130.250	€ 129.035	€ 130.168	€ 128.593
Hiemkunde, Comperio	€ 18.962	€ 19.096	€ 20.112	€ 19.096
Kontribusies De Ovend	€ 18.000	€ 16.993	€ 18.003	€ 18.000
Adverteensies De Ovend	€ 1.200	€ 771	€ 600	€ 1.200
Bi'jdrege Et Boekfoons	€ 6.458	€ 5.000	€ 5.000	€ 15.000
Vergoeding kursusgeld	€ 2.000	€ 984	€ 1.514	€ 1.500
Diversen	€ 1.000	€ 5.516	€ 5.772	€ 8.316
	-----	-----	-----	-----
	€ 177.870	€ 177.335	€ 181.169	€ 191.705
<b>Et Boekefoons</b>				
Omzet boeken etc.		€ 16.957	€ 24.199	
Subsidies		€ 7.000	€ 6.234	
Rentebaoten		€ 358	€ 1.139	
		-----	-----	
		€ 24.315	€ 31.551	
	=====	=====	=====	=====
<b>TETAOL BAOTEN</b>	<b>€ 177.870</b>	<b>€ 201.650</b>	<b>€ 212.720</b>	<b>€ 191.705</b>
<b>LASTEN</b>				
<b>Stell. Schrieversronte</b>				
Passenielskosten	€ 130.590	€ 134.724	€ 136.800	€ 150.150
Ofschrievings	€ 314	€ 506	€ 559	€ 299
Huusvestingskosten	€ 12.000	€ 10.572	€ 11.825	€ 10.806
Inventaoriskosten	€ 4.000	€ 3.346	€ 4.224	€ 3.500
Uutvoeringskosten	€ 4.500	€ 6.580	€ 4.905	€ 4.500
Algemeine kosten	€ 14.000	€ 18.040	€ 13.882	€ 12.000
Lede-aktiviteiten	€ 12.000	€ 11.895	€ 11.221	€ 10.000
Financiële baoten en lasten	€ 466	€ 407	€ 472	€ 450
Popfestival		€ 901	€ 14	
	-----	-----	-----	-----
	€ 177.870	€ 186.935	€ 183.902	€ 191.705
<b>Et Boekefoons</b>				
Kostpries omzet		€ 15.601	€ 16.797	
Passenielskosten		€ 8.000	€ 9.458	
Bedriefskosten		€ 9.428	€ 7.454	
Rentebaoten		€ 137	€ 222	
		-----	-----	
		€ 33.166	€ 33.932	
	=====	=====	=====	=====
<b>TETAOL LASTEN</b>	<b>€ 177.870</b>	<b>€ 220.101</b>	<b>€ 217.834</b>	<b>€ 191.705</b>
<b>NAODELIG RISSELTAOT</b>				
		<b>€ -18.451</b>	<b>€ -€ 5.114</b>	
		=====	=====	

Veur een naodere toelochting wodt verwezen naor de repotten inzaeke jaorstokken Stichting Stellingwarver Schrieversronte en Stichting Et Boekefoons d.d. 28 maart 2017 deur MRW Accountants.